

沈侍中集題詞

文人顛沛若沈初明者其真窮乎年
齒知命位僅邑長遭亂執節瀕死幸
生梁元進討賊景東奔可冀苟安猶
不免殺妻子屠昆季非張儉之亡命
類李陵之無家悲哉一身不復望振

播竄西魏再入新朝高文寵貴寄以
千城遲鈍五十而收榮晚路窮而變
變而通卽功名猶然哉勸進三表長
聲慷慨絕近劉越石陳情辛寔又有
李令伯風至爲陳太傅讓表義正辭
壯卽阮嗣宗上晉王箋曷加焉恭子

雋才雅慕忠孝冒危履險情深指哀
過殷墟而箕子涕睹風木而吾丘泣
所處然也行經通天臺上表漢武亦
雀臺雍丘憑弔常事何至發夢帝宮
還身故壤鄧晨有云忠信感靈其事
異其志悲矣存詩頗少詠十二神尤

沈侍中集 是言
驚創體亦戲謔類耳江南文體入陳
更衰非徐僕射沈侍中代無作者乃
故崎嶇其遇俾光詞苑斯文之際天
豈無意乎

婁東張溥題

沈侍中集目錄

賦

歸魂賦

有引

幽庭賦

表

爲王僧辯勸進梁元帝初表

勸進梁元帝第二表

勸進梁元帝第三表

爲百官勸進陳武帝表

爲陳太傅讓表

經通天臺奏漢武帝表

陳情表

爲周弘正讓太常表

爲周儀同失律後復官表

啟

爲王僧辯答貞陽侯啟

爲王僧辯重答貞陽侯啟

爲王僧辯奉貞陽侯啟

書

爲王僧辯重奉貞陽侯啟

答張種書

銘

太極殿銘 有序

碑

林屋館碑

太尉始興昭烈王碑

哀策文

陳武帝哀策文

祭文

祭梁吳郡袁府君文

文

爲陳霸光與王僧辯盟文

樂府

長安少年行

獨酌謠

詩

從駕送軍

望郢州城

長安還至方山愴然自傷

離合詩贈江藻

建除詩

六府詩

八音詩

六甲詩

十二屬詩

從遊天中寺應令

同庾中庶肩吾周處士弘讓遊明慶寺
名都一何綺

爲我彈鳴琴

賦得邊馬有歸心

詠老馬

和蔡黃門口字詠絕句

附錄

本傳

沈侍中集卷之全

陳吳興沈炯著

明太倉張溥閱

賦

歸魂賦 有引

古語稱收魂升極，周易有歸魂卦，屈原著招魂篇，故知魂之可歸，其日已久，余自長安反，乃作歸魂賦，其辭曰：

伊吾人之陋宗，資玄聖而云始，肇邵閔之靈源，

分昌發之世祀，實聞之乎家記。又孚之於惇史，亢宗貴而博古，四史成乎一身。怪日月之遼遠，而承襲之相因。豈少賤之能察，非末學之知津也。若夫風流退讓，在秦作相，越江以東，惟戎及鄂。出忠出孝，且卿且公。世歷十五，爰逮余躬。值天地之幅裂，遭日月之秀虹。去父母之邦國，埋形影於胡戎。絕君臣而辭骨肉，踏厚地而跼蒼穹。抱北思之胡馬，望南飛之夕鴻。泣霑襟而雜露，悲微吟而帶風。昔休明之云始，余播棄於天

地。自太學而遊承明，出書生而從下吏。身豫封禪之官，名入南宮之記。登玉墀之深眇，出金門之崇邃。受北狄之奉書，禮東夷之獻使。實不嘗至，屈膝遜言，以殊方降意。嗟五十之踰年，忽流離於凶忒。值中軍之失權，而大盜之移國。何赤疹之四起，豈黃霧之云塞。祈瘦弟於赤眉，乞老親於劇賊。免伏質以解衣，遂窘身而就勒。既而天道禍淫，否終斯泰。靈聖奮發，風雲饗會。掃欃槍之星，斬蚩尤之旆。余扳逆而効從，遂妻誅

沈氏月集 卷全
而子害雖分珪而祚土迄長河之如帶肌膚之
痛何泯潛翳之悲無狀我國家之沸騰我天下
之匡復我何辜於上玄我何負於鄰睦背盟書
而我欺圖信神而我戮彼孟冬之云季總官司
而就繼託馬首之西暮隨檻車而迴轍履峨峨
之層氷面颺颺之巖雪去莫敖之所綏過臨江
之軌折矧今古之悲涼竝攢心而霑袂渡狹石
之歛危跨清津之幽咽烏虛弓而自隕猿號子
而腹裂歷沔漠之逶迤及楚郡之參差望隆中

之大宅映峴首之沉碑旣縲然而就缺非造次
之能窺至若高祖武皇帝之基天下也岐周景
亳之地龜圖雀書之秘醒醉之歌味絕讓畔之
田鱗次余旣長於克民覺何從而掩泗洧水兮
深且清宛水兮澄復明昔南陽之穰縣今百雉
之都城我太宗之威武遏宛洧而陳兵百萬之
虜俄成魚鼈千仞之阜倏似滄瀛雖德刑成於
赦服故蠻狄震乎雄名乃尋浙而歷商遂經秦
而至洛覺高蹈之清遠具風雲之倏爍其山也

沙傳日集 卷全
則嶽岑崑崙巖嶮婆陀或孤峰而秀聚或逸出而橫羅千歲之木坐嶺表百丈之石枕谿阿其水則碎訇滌汨或寬或疾擊萬瀨而相奔聚千流而同出何武關之狹隘而漢祖之英雄山萬里而仰雲霧水百仞而寫蜿蜒若一夫而守隘豈萬衆之能攻去青泥而踰白鹿越渥水而到青門長卿之賦可想邵平之迹不存咄嗟驪山之阜惆悵灞陵之園文恭儉而無隙嬴發掘其何言訪軹道之長組拾藍田之璵璠無故老之

可訊竝膺膺之空原登未央之北闕望長樂之基趾伊太后之所居築旗亭而成市槐路鬱以三條方塗坦而九軌觀阡陌之遺蹤實不乖乎前史傍直城而北轉臨橫門而左趨南則董卓之塢北則苻堅所居卽二賊之墟壘爲彼主之庭除終南龍窠太一嵯峨九巖掘起八壘連河汨經泥之混濁盟渭渚之清波指咸陽而長望何趙李而經過息甘泉而避暑猶爽塏而清和爾乃背長夏涉素秋臥寒野坐林岵霜微凝而

沈氏中集 卷全
侵骨樹裁動而風遁思我親戚之顏貌寄夢寐
而魂求察故鄉之安否但望斗而觀牛稚子天
於鄭谷勉勵愧乎延州聞愛妾之長叫引寒風
而入楸何精靈以堪此乃縱酒以陶憂至誠可
以感鬼秉信可以祈天何精隕而魄散忽魂歸
而氣旋解龍驟而見送走郵驛於亭傳出向來
之大道反初入之山川受繞朝之贈策報李陵
之別篇淚未悲而自墮語未咽而無宣於時和
風四起具物初榮草極野而舒翠花分叢而落

英魚則潛波渙濯鳥則應嶺俱鳴隨六合之開
朗與風雲而自輕其所涉也州則二雍三荆冒
歡江并唐安浙洛巴鄧雲平其水則淮江漢洧
隨浩汗澧潦澹潏河涇渭相亂或浮溪而揭淺
或凌波而沿岸每日夕而靡依常一步而三歎
蠻蠻之與荆吳玄狄之與羗胡言語之所不通
嗜欲之所不同莫不疊足歛手低眉曲躬豈論
生平與意氣止望首丘於南風悲城邑之毀撤
意風水之渺揚既盡地而謁帝乃懷橘而升堂

沈氏詩集 卷全 五
何神僊之足學此卽雲衣而虹裳也

幽庭賦

矧幽庭之閑趣具春物之芳華轉洞房而引景
偃飛閣而藏霞築山川於戶牖帶林苑於東家
草纖纖而垂綠樹搔搔而落花於是秦人清歌
趙女鼓筑嗟光景之遲暮詠羣飛之棲宿顧留
情於君子豈含姿於嬌淑於是起而長謠曰故
年花落今復新新年一故成故人那得長繩繫
落日年年月月但如春

表

爲王僧辯勸進梁元帝初表

衆軍薄伐塗次九水卽日獲臨城縣使人報稱
侯景弑逆皇帝賊害太子宗室在寇庭者竝罹
禍酷六軍慟哭三辰改曜哀我皇極四海崩心
我大梁纂堯構緒基商啓祚太祖文皇帝狗齊
作聖肇有六州高祖武皇帝聰明神武奄龕天
下依日月而和四時履至尊而制六合麗正居
貞大橫固祉四葉相係三聖同基蠢爾凶渠遂

馮天邑。閭闔受白登之辱。象魏致堯城之疑。雲
辰承華。一朝俱酷。金楨玉幹。莫不同寃。悠悠彼
蒼。何其罔極。臣聞喪君有君。春秋之茂典。以德
以長。先王之通訓。少康則牧衆撫職。祀夏所以
配天。平王則居正東遷。宗周所以卜世。漢光以
能捕不道。故景歷重昌。中宗以不違羣議。故江
東可立。儔今考古。更無二謀。伏惟陛下。至孝通
幽。英武靈斷。當七九之厄。而應千載之期。啓殷
憂之明。而居百王之會。取威定霸。險阻艱難。建

社治兵。載循古道。家國之事。一至於斯。天祚大
梁。必將有主。軒轅得姓。存者二人。高祖五王。代
實居長。乘屈完而陳。諸侯拜子武而服。大輅功
齊九有。道濟生民。非奉聖明。誰嗣下武。臣聞日
月貞明。太陽不可以闕照。天地貞觀。乾道不可
以久惕。黃屋左纛。本爲億兆而尊。鸞輅龍章。蓋
以郊禋而貴。寶器存乎至重。介石慎於易差。黔
首豈可少選。無君宗祏。豈可一日無主。伏願陛
下掃地升中。柴天改物。事迫凶危。運鍾擾攘。蓋

不勞宗正奉詔。博士擇時。南面即可居尊。西向無所讓德。四方既知有奉。八百始可同期。殘寇潛居。器藏社處。乾象既傾。坤儀已覆。斬莽輓車。燒卓照市。廓清函夏。正爲瑩陵。開雪宮闈。庶存鐘鼎。彼黍離離。伊何可言。陛下繼明。闡祚卽宮。舊楚左廟。右社之制。可以權宜。五禮六樂之容。歲時取備。金芝九莖。瓊茅三脊。要衛率職。尉候相望。坐廟堂以朝四夷。登靈臺而望雲物。禪梁甫而封泰山。臨東濱而禮日觀。然後與三事大夫。更謀都鄙。左瀝右澗。夾維可以爲居。抗殿疏龍。惟王可以在鎬。何必勤勤。建業也哉。臣等不勝控欵之至。謹拜表以聞。

○勸進梁元帝第二表

紫宸曠位。赤縣無主。百靈聳動。萬國回皇。雖醉醒相扶。同歸景毫。式歌且誦。總赴唐郊。猶懼陛下。俛首潛然。讓德不嗣。傳車在道。方慎宋昌之謀。法駕已陳。尚杜耿純之勸。岳牧翹首。天民累息。臣聞星回日薄。擊雷鞭電者之謂天。岳立川

流吐霧蒸雲者之謂地。苞天地之混成。洞陰陽之不測。而以財成萬物者。其在聖人乎。故云天地之大德曰生。聖人之大寶曰位。黃屋廟堂之下。本非獲已而居。明鏡四衢之罇。蓋由應物取訓。伏惟陛下稽古文思。英雄特達。比以周旦。則文王之子。方之放勛。則帝摯之季。千年旦暮。可不在斯。庭闕湮亡。鐘鼎淪覆。嗣膺景歷。非陛下而誰。豈可使赤眉更立盆子。隗囂託置高廟。陛下方復從容高讓。用執謙光。展其矯行。僞書誣

罔正朔。見機而作。斷可識矣。匪疑何卜。無待老龜。日者公卿失馭。禍纏霄極。獯羯憑陵。姦臣互起。率戎伐頽。無處不然。勸明誅晉。惻足皆爾。才斗夜鳴。烽火相照。中朝人士。相顧銜悲。涼州義徒。東望殞涕。慄慄黔首。將欲安歸。陛下英略緯天。沉明內斷。橫劔泣血。枕戈嘗膽。農山圯下之策。金匱玉鼎之謀。莫不定算。辰帷決勝千里。擊靈鼉之鼓。而建翠華之旗。驅六州之兵。而總九伯之伐。四方雖虞。一戰以霸。斬其鯨鯢。旣章大

戮何校滅耳。莫匪姦回。史不絕書。府無虛月。自
洞庭安波。彭蠡底定。文昭武穆。芳若椒蘭。敵國
降城。和如親戚。九服同謀。百道俱進。國耻家怨。
計期就雪。社稷不墜。繫在聖明。今也何時。而申
帝啓之避。凶危若此。方陳泰伯之辭。國有具臣。
誰敢奉詔。天下者高祖之天下。陛下者萬國之
歡心。萬國豈可無君。高祖豈可廢祀。卽日五星
夜聚。八風通吹。雲煙紛郁。日月光華。百官象物
而動。軍政不戒。而備飛艦巨艦。竟水浮川。鐵馬

銀鞍。陵山跨谷。英傑接踵。忠勇相顧。湛宗族以
酬恩。焚妻子以報主。莫不覆楯銜威。捉斧擊衆。
風飛電耀。志滅凶醜。所待陛下昭告后土。虔奉
上帝。廣發明詔。師出以名。五行夕返。六軍曉進。
便當盡司寇之威。窮蚩尤之伐。執石趙而求蠶。
斬姚秦而取鐘。脩掃瑩陵。奉近宗廟。陛下豈得
不仰存國計。俯從民請。漢宣嗣位之後。卽遣蒲
類之軍。光武登極。旣竟始有長安之捷。由此言
之。不無前准。臣等或世受朝恩。或身荷重遇。同

休等戚自國刑家苟有腹心敢以死奪不任悽
悽之至謹重奉表以聞

○勸進梁元帝第三表

衆軍以今月戊子總集建康賊景烏伏獸窮頻
擊頻挫姦竭詐盡深溝自固臣等分勒武旅百
道同趨突騎短兵犀函鐵楯結隊千羣持戟百
萬止紂七步圍項三重轟然大潰羣凶四滅京
師少長俱稱萬歲長安酒食於此價高九縣雲
開六合清朗矧伊黔首誰不載躍伏惟陛下咀

痛茹哀嬰憤忍酷自紫庭絳闕胡塵四起墉垣
好時冀馬雲屯泣血臨兵嘗膽誓衆而吳楚一
家方與七國俱反管蔡流言又以三監作亂西
涼義衆阻秦塞而不通并州遺民跨飛狐而見
絕豺狼當路非止一人鯨鯢不臬倏焉五載英
武克振怨耻竝雪永尋霜露伊何可勝臣等輒
依故實奉脩社廟使者持節分告園陵嗣后升
遐龍輶未殯承華掩曜梓宮莫測竝卽隨由備
辦禮具凶荒四海同哀六軍袒哭聖情孝友理

當感慟。日者百司岳牧。仰祈宸鑒。以錫珪之功。既歸有道。當璧之禮。允屬聖明。而優詔謙冲。窅然凝邈。飛龍可躋。而乾爻在四。帝閤云叫。而閭闔未開。謳歌載馳。是用翹首。所以越人固執。熏丹穴以求君。周民樂推。踰岐山而事主。漢王不卽位。無以貴功臣。光武止蕭王。豈謂紹宗廟。黃帝迷於襄城。尚訪御人之道。放勛入於姑射。猶使罇俎有歸。伊此儻來。豈聖人所欲。帝王所應。不獲已而然。伏讀璽書。尋諷制旨。領懷物外。未

奉慈衷。陛下日角龍顏之姿。表於狗齊之日。彤雲素靈之瑞。基於應物之初。博學則大哉無所與名。溪言則曄乎文章之觀。忠爲令德。孝實動天。加以英威茂略。雄圖武算。指麾則丹浦不戰。顧眄則阪泉自蕩。地維絕而重紐。天柱傾而更植。鑿河津於孟門。百川復啓。補穹儀以五石。萬物再生。縱陛下拂袵衣而遊廣成。登弁山而去東土。羣臣安得仰訴。兆庶何所歸仁。況郊祀配天。壘筐禮曠。齋宮清廟。匏竹不陳。仰望鸞輿。匪

朝伊夕。瞻言法駕。載渴且饑。豈可久稽衆議。有曠彝則。舊邦凱復。函洛已平。高奴櫟陽。宮館雖毀。濁河清渭。佳氣猶存。臯門有亢。甘泉四敞。土圭測景。仙人承露。斯蓋九州之赤縣。六合之樞機。博士捧圖書而稍還。太常定禮儀其已列。豈得不揚清警而赴名都。具玉鑾而旋正寢。昔東周既遷。鎬京遂其不復。長安一亂。邠洛永以爲居。夏后以萬國朝諸侯。文王以六州匡天下。方之跡基百里。劔杖三尺。以殘楚之地。抗拒六戎。一旅之卒。翦夷三叛。坦然大定。御辯東歸。解五牛於冀州。秣六馬於譙郡。緬求前古。其可得歟。對揚天命。無所讓德。有理存焉。敢重新奏。

爲百官勸進陳武帝表

臣聞春榮秋落。四時所以迭代。金行水流。五德所以互序。昔陶唐告終。有虞氏作。漢魏禪讓。晉宋以之。登庸夫有非常之功。有非常之賞。能利天下者。受天下之利。陛下造化之功。日月之德。褰裳去之。物誰仰訴。頃五星夜聚。八風通吹。豐

露呈甘，卿雲舒簇，白狼遠至，素雉朝飛，天意顯然，靈貺可覩。

○○為陳太傅讓表

奏六代之舞，不能祚天，具百神之歌，無以動聖。延首當闈，轉增危慄，百川沸騰，百室如燬，釋位同謀，諸侯總至，盟書會府，餘臣一人，若使幅巾衡巷，口絕平吳，朝遊赤松，暮過濟北，出就侯服，入褫龍章，則四郊有壘，誰守社稷，如其雄戟在前，強弩自衛，負孺子之圖飾，緣鵲之鼎，軍威重

於護將國禮，貴於寒門，則臣道尚卑，孰云非逼。臣所以出謝公卿，入訓妻子，拜長陵之園，謁太祖之廟，不以九族違恩，義不以百姓負國家所期。陛下與北極同壽，朝廷與南山同固。

經通天臺奏漢武帝表

臣聞橋山雖掩，鼎湖之竈可祠，有魯遂荒，大庭之跡無泯，伏惟陛下降德倚蘭，纂靈豐谷，漢道既登，神僊可望，射之杲於海浦，禮日觀而稱功，橫中流於汾河，指栢梁而高宴，何其甚樂，豈不

然歟。既而運屬上僊，道窮晏駕，甲帳珠簾，一朝
 零落。茂陵玉盃，宛出人間。陵雲故基，共原田而
 撫。撫別風餘趾，帶陵阜而茫茫。羈旅縲臣，能不
 落淚。昔承明既厭，嚴助東歸。駟馬可乘，長卿西
 反。恭聞故實，竊有愚心。黍稷非馨，敢望徼福。但
 雀臺之弔，空愴魏君。雍丘之祠，未光夏后。瞻仰
 煙霞，伏增悽戀。藝文龜作靈甲帳作翠幕宛出
 作遠出別風作扶風既厭作見

陳情表

臣嬰生不幸，弱冠而孤，母子零丁，兄弟相長，謹
 身為養，仕不擇官，承襲朝命，偶在亂世，冒危履
 險，自死輕生，妻息誅夷，昆季屠滅，餘臣母子，得
 逢興運，臣母妾劉今年八十有一，臣叔母妾丘
 七十有五，私門弟姪故自無人，妾丘兒孫又久
 亡泯，兩家侍養，餘臣一人，前帝知臣之孤，筮眷
 臣以州里，不欲使頓居草萊，又復矜臣溫清，所
 以一年之內，再三休沐，臣之屢披丹款，頻冒宸
 鑒，非欲苟違朝廷，遠離畿輦，一者以年將六十。

湯火居心。每跪讀家書。前懼後喜。溫枕扇席。無復成童。二者職居彝憲。邦之司直。若自虧身禮。何問國章。前德綢繆。始許哀放。內侍近臣。多悉此旨。正以選賢與能。廣求明哲。越趨荏苒。未始取才。而上玄降戾。奄至今日。德音在耳。墳土遽乾。悠悠昊天。哀此罔極。兼臣私心。煎切彌迫。近時悽悽之祈。轉忘塵觸。伏惟陛下睿哲聰明。嗣興下武。刑於四海。弘此孝理。寸管求天。仰歸帷宸。有感必應。實望聖明。特乞霈然。申其私禮。則

王者之德。覃及無方。矧彼翔沈。孰非涵養。

云

云

、爲周弘正讓太常表

臣聞玉舄雕楹。不取材於蟠木。丹朱繡黼。豈襲冕於蘿薜。何則。適用各有所宜。朝野不可一旨。叔孫之分。定禮儀。倍資典實。才協之躬。爲唱引。豈易其儀。賓主闕對。封禪失儀。責以司存。云誰之咎。況南史執簡。轉見違才。君舉必書。尤難妄冒。

○爲周儀同失律後復官表

日者驟驚鄭馬。害在晉軍。獄囚悲其夜數。縲人切其曉奏。危光似燭。察命如絲。云誰之尤。自貽其咎。假令誅以妻子。戮及墳墓。漢非負德。陵實孤恩。況伏鎖俛眉。遂受淮陰之間。吞聲飲恨。不與臧洪共死。陛下憐而宥之。伊臣豈不獨愧。喪其子弟。六謝父兄。百萬之師。千夫有長。問臣安在。誰曰董司。魂遊奉高。不知何對。

啓

爲王僧辯答貞陽侯啓

席威卿反命。具有奉答。馬嵩仁至。又奉去月二十八日誨。增用傾悚。秦爲不道。西都失守。率土臣妾。莫不驚惶。喪君有君。實惟典禮。繼世嗣曆。明於通誥。所以百辟羣司。四方岳牧。共立大計。僉議所歸。故紹晉安殿下。用傳寶祚。樹立之宜。無由遠謀。鄰國足下。宗枝蕃戚。德譽早隆。旣身限北庭。事隔匡贊。今者借助齊主。揚旆南轅。但

嗣守洪基，卽旣其主。若阿衡帝載，誠所推揖。弘佐中興，誰曰不可。所望齊朝永存信誓，謹當命北舟人奉迎麾駕，無容進枉齊兵，遠於江表。仰冀弼諧時政，用極奮庸。但江東之地，數千餘里，民附國險，水陸衿帶。若舊京從命，揚徐承旨，又恐西南之地，二十餘州，不卽威懷，容爲齊國之患。而糧裹之宜，更遲動靜，祇展之日，冀在一二。謹因馬嵩仁并遣貞威將軍通直郎散騎常侍馬瑱，口宣諮述。

爲王僧辯重答貞陽侯啓

席威卿至，奉今月五日誨，披函俯紙，號耻交哀。天未悔禍，地維重絕。九縣沸騰，四海悲憤。嗣主欽明，濬哲齊聖。廣淵體自宸極，受命文祖。主梁祀者，非此而誰。且年倍漢昭，弗明上官之詐。德踰姬誦，彌昭周旦之誠。今海內衣冠，中朝卿士，或南陽舊隸，官成天監之初。代邸故臣，榮光承聖之始。莫不人竭其力，爭求效命。輸心嗣主，以報先帝之恩。今荆陝淪覆，正是江北數縣，卽東

沈氏中集 卷之八
處詢謀物論參差未甚決定始得侯瑱信示西
寇權景宣書令以真跡上呈觀視將帥恣欲同
泰若一朝仰違大國臣不辭灰粉悲梁祚永絕
中興伏願陛下便事濟江仰藉皇齊之威憑陛
下至聖之略樹君以長雪報可期社稷再輝死
且非吝請押別使曹冲馳表齊都續啓事以聞
伏遲拜奉在促

爲王僧辯重奉貞陽侯啓

員外常侍姜暄還奉勅伏具動止大齊仁義之
風曲被鄰國卹災救難申此大猷皇家枝戚莫
不榮荷江東冠冕俱知憑賴今軟不怠信信實
由衷謹遣臣第七息顯顯所生劉并弟子世珍
往彼充質仍遣左民尚書周弘正至歷陽奉迎
臚舳浮江俟一龍之渡清宮丹陛候六傳之入
萬國傾心同榮晉文之反三善克宣方流宋昌
之議國祚旣隆社稷有奉則羣臣竭節報厚施
於大齊戮力展愚效忠誠於陛下今遣吏部尚
書王通奉啓以聞

沈氏中集 卷全
南藩翰萬里而遙主甲治兵舳艫相接長波天
限方漢城池脩德綏民中興可待孤子本以庸
懦加復窮喘且平生素蓄志不在位世蒙朝寵
身實許國武皇擢之千里先主申其三顧因此
踰濫遂居端右屬天步艱難寄深憂積方欲詢
於髦傑採之輿皂同康時務共贊皇猷一彼車
書刷茲讐耻然後守其侯服歸老赤松至如今
日使須白事披奉來諱承彼送還今璇枝令戚
播越秦虜明公儻能入朝同獎王室伊呂之任

僉曰仰歸寧不副茲多席濟扶匡救若斯言不
渝更聽後旨便遣鷁舟虹舸奉迎麾旆但閱來
朝意在上盟今江東所奉彼屬披圖未蒙朝意
鄭拒子忽左史是之漢蒞劉襄班書稱允況屬
疎於昔彌不敢聞命謀期通識賜亮此誠

爲王僧辯奉貞陽侯啓

自秦兵寇陝臣便營赴援纔及下船荆城陷沒
卽遣劉周入國具表丹誠左右勳豪初竝同契
周旣多時不還人情疑阻比冊降中使復遣諸

沈氏中集 卷之八 五
處詢謀物論參差未甚決定始得侯瑱信示西
寇權景宣書令以真跡上呈觀視將帥恣欲同
泰若一朝仰違大國臣不辭灰粉悲梁祚永絕
中興伏願陛下便事濟江仰藉皇齊之威憑陛
下至聖之略樹君以長雪報可期社稷再輝死
且非吝請押別使曹冲馳表齊都續啓事以聞
伏遲拜奉在促

爲王僧辯重奉貞陽侯啓

員外常侍姜暲還奉勅伏具動止犬齊仁義之
風曲被鄰國卹災救難申此大猷皇家枝戚莫
不榮荷江東冠冕俱知憑賴今歎不忘信信實
由衷謹遣臣第七息顯顯所生劉并弟子世珍
往彼充質仍遣左民尚書周弘正至歷陽奉迎
臚舳浮江俟一龍之渡清宮丹陛候六傳之入
萬國傾心同榮晉文之反三善克宣方流宋昌
之議國祚旣隆社稷有奉則羣臣竭節報厚施
於大齊戮力展愚效忠誠於陛下今遣吏部尚
書王通奉啓以聞

三

書

答張種書

若乃三江五湖、洞庭巨麗、寫長洲之茂苑、登九
曲之層臺、山高水深、雲蒸霧吐、其中之秀異者、
實虎丘之靈阜焉、冬桂夏栢、長蘿脩竹、靈源祕
洞、轉側超絕、遠澗深岨、交羅戶穴、

銘

太極殿銘

有序

臣聞在天成象、紫宮所以昭著、在地成形、赤縣居其區宇、太極殿者資兩儀之意焉、大壯顯其全模、土圭測其正影、周曰路寢、漢稱前殿、雖名號參差、其實一也、主上未明求衣、日旰忘食、隳樂壞禮、造次畱神、漢陞秦除、莫不葺復、而此殿興造累歲、未成、外邁戎機、內憂民力、劬勞深慮、在苒移時、至陳永定、六合旣清、五禮稍備、雕楹

玉舄華榱璧璫揆之有日而猶一柱榱楠豫章地淪外寇楚材晉用非復我求既而新亭前江有流查甚壯盤根錯節枝葉葱蒨津人以聞正堪時用於是将作受詔冬官奉職百工竝作屢降乘輿匠石磨礮必經天旨儉而不固泰而不奢億兆填填而樂成也曾未數旬煥然雲構昔晉朝繕造文杏有闕梅梁瑞至畫以標花自是迄今又獲神物卽樟樹焉殿之某間卽某柱是也銘曰

軒轅狹堂夏后卑宮文來質往蹇產彌崇體制八都開茲萬戶灼爍雄梁徘徊大廡璧月宵懸卿雲晝聚豈伊闔陽飛來應柱嘉辰令月新寢告成青槐赤棘卽將司兵翠被負宸百辟公卿鐘鼓八佾蕭韶九成庸臣再拜天子萬齡

碑

林屋館碑

夫玄之又玄處衆妙之極可乎不可成道行之
致斯蓋寂寞窅冥希微恍惚故非淮南八僊之
圖瀨鄉九井之記至若崑山平圃銀榜相暉蓬
閩僊宮金臺崛起南瞰晉臺傍連飛閣桂柱星
羅瓊軒雲構銘曰

大道既隱衆聖無門悠悠太極誰見玄根祈年
立秦望仙表漢髣髴神靈依稀宮觀峨峨林屋

沈氏中集 卷全
輪奐徘徊庭羅花鳥室靜塵埃

大尉始興昭烈王碑

古者帝王之興莫不崇建親屏泰伯讓而退封武哀終而受號則有之矣。至若勒功鼎鼐銘德太常清廟尊乎國家揚名顯乎子弟在昭烈王見之焉。若夫媯水遙源石罟遐集五絲作而詠南風八世興而和鳴鳳籍帝王之基居正卿之族有由來矣。孔融汝穎之論許其少多。傅暢諸公之書頗有賢哲。漢至魏涉江而東縣邈蟬

聯言之者舊皇上革命應運大啓邦國麟趾磐石之宗固金楨玉幹之戚畢封文叔掩被之悲無泯仲謀援鞍之慟逾切乃封始興郡王永定元年下詔曰天倫所感義本因心名器追崇則惟恒典亡兄梁故南兖州刺史長城縣公德範沈邃風度寬厚性與天通深乎靡測昔彈冠入仕譽重城華宣力艱難遂顧洪業雖時非季漢勢異桓王海內挹其風流生民懷其大德者矣朕受天明命爰膺寶曆言尋永往興慕增懷

沈氏中集 卷全
可奉贈太尉公昔之密戚近親宗英令德若河
間之不羣沛獻之受象東平之樂善陳思之藻
麗實聞之也未有身死忠貞名存前代若王之
義烈者銘曰

稽古帝舜重瞳有裔曰陳祚土纂虞之系騰波
汝穎承流媯汭四嶽有後六奇獻計惟寔惟忠
卿長羣公浮舟震澤佳氣葱葱岐周七十商毫
百里婉婉中陽帝出攸止太常景皇季孫讓子
天下不踐間之惇史入季出忠清輝何已苞指

周藏風流懿德言爲世範行成士則名山可鐫
豐碑易勒惜哉往矣殞身凶慝鼎命旣遷山河
是始光啓代郡德表永祀周以別功魯侯戾止
禮茂廟堂恩加松柏

哀策文

陳武帝哀策文

望三靈而標目，躋九地而崩心。哭仍几之將撤，慟祖鬯之虛斟。黃屋侵而白日掩，紫極涵而浮雲陰。其辭曰

悠悠媯水，鬱鬱姚墟。惟帝之系，在唐作虞。正卿之後，握此靈符。雕雲布族，祥星結樞。負茲大鏡，未拾遺珠。爰初發跡，斬虵鞠旅。大定番禺，載戡海渚。承釁而運，席卷中流。王室如燬，乃合諸侯。

沈氏中集 卷全 三
負鐵誓衆，釋位同謀，俱登涿鹿，實斷蚩尤，道濟
一匡，功歸四履，爰總百官，訓於天子，儻來有運，
事非獲已，翠龜負字，赤雀銜書，謳訶適夏，禮樂
遷虞，負辰正位，升壇受圖，二儀協序，五緯同符，
門歌麟趾，室詠騶虞，奉常定日，太卜蠲時，升中
備物，方告雍熙，天甘玉露，地秀金芝，休禎未答，
靈貺徒欺，吏求穆卜，詔絕良鑒，義蹕失御，天街
褫蹕，夏采升榮，宮車晏出，洞閨移凶，玄庭罷吉，
閑宵宵之窮燈，去昭昭之遊日，歸大暮之不暘。

降幽宮而長畢，巫咸筮告，容成戒期，文衛如在，
葆鐸相悲，去畢陌而東顧，望橋山而路遲，臣攀
龍而尚在，魂過沛而何之，侍低昂之靈燾，奉寂
寂之空帷，銅雀沒於脩松，平陵隱於溪栢，節鼓
鼓之哀音，燎燿火於通夕，薤露落而暮日寒，玄
霜凝而壟草白，銘功德於旂常，被徽音於鐘石，
迴天儀於清廟，祔祖考而來格，播茂實與英聲，
鬱氛氲於宗祏。

祭文

祭梁吳郡袁府君文

夫宮鳴徵應，響韻相趨。桂馥蘭芬，期臭在斯。道合一朝，豈忘千載。日者明德世彥，振纓王室。坐嘯大邦，顯治巨麗。竊以不敏，出宰勾吳。上郡下邑，都城接雉。雖王事靡盬，無失豫遊。窺洞庭於五湖，登姑蘇於九曲。身後之事，一至於斯。今者長樂未央，已夾樛里之墓。公宮魯庫，非復少昊之墟。成土一棺，未知何託。解劔絮漿，轉增欷歔。

文

○爲陳霸光與王僧辯盟文

賊臣侯景凶羯小胡，逆天無狀，構造姦惡，違背我恩義，破掠我國家，毒害我生民，移毀我社廟。我高祖武皇帝靈聖聰明，光宅天下，勛勞兆庶，亭育萬民，如我考妣，五十所載，哀景以窮，見歸全景，將戮之首，置景要害之地，崇景非次之榮。我高祖於景何薄，我百姓於景何怨，而景長戟彊弩，陵躐朝廷，鋸牙郊甸，殘食含靈，剝肝斲趾。

不厭其快。曝骨焚尸。不謂爲酷。高祖非食卑宮。春秋九十。屈志凝威。憤終賊手。大行皇帝。溫嚴恭默。丕守鴻名。於景何有。復加忍毒。皇枝緝抱。已上總功。以還窮刀。極俎旣屠。且膾豈有率土之濱。謂爲王臣。食人之禾。飲人之水。忍聞此痛。而不悼心。況臣僧辯。臣霸先等。荷稱國藩。湘東王臣。諱泣血銜哀之寄。摩頂至足之恩。世受先朝之德。身當將相之任。而不能瀝膽抽腸。共誅姦逆。雪天地之痛。報君父之讐。則不可以稟靈

含識。戴天履地。今日相國。至孝玄感。靈武斯發。已破賊徒。獲其元帥。止餘景身。尚在京邑。臣僧辯與臣霸先。協和將帥。同心共契。必誅凶豎。尊奉相國。嗣膺鴻業。以主郊祭。前途若有一功。獲一賞。臣僧辯等不推已讓物。先身帥衆。則天地宗廟百神之靈。共誅共責。臣僧辯臣霸先同心共事。不相欺負。若有違戾。明神極之。

樂府

長安少年行

長安好少年，驄馬鐵連錢。陳王裝腦勒，晉后鑄金鞭。步搖如飛燕，寶劍一作劍似舒蓮。去來新市側，遨遊大道邊。道邊一老翁，顏鬢如衰蓬。自言居一作生漢世，少小見豪雄。五侯俱拜爵，七貴各論功。建章通北闕，複道度南宮。太后居長樂，天子出回中。玉輦迎飛燕，金山賞鄧通。一朝復一日，忽見朝市空。扶桑無復海，崑山倒向東。少年

沈氏詩集 卷之三
何假問、頽齡值福終、子孫冥滅盡、鄉間復不同、
淚盡眼方暗、髀傷耳自聾、杖策尋遺老、歌嘯詠
悲翁、遭隨各有遇、非敢訪童蒙、

獨酌謠

獨酌謠、獨酌獨長謠、智者不我顧、愚夫余未要、
不愚復不智、誰當余見招、所以成獨酌、一酌傾
一瓢、生涯本漫漫、神理暫超超、再酌矜許史、三
酌傲松喬、頻煩四五酌、不覺凌丹霄、倏爾厭五
鼎、俄然賤九韶、彭殤無異塋、夷蹠可同朝、龍螭

非不屈、鵬鷖但逍遙、寄語號呶侶、無乃太塵囂、

詩

從駕送軍

惟堯稱乃武，軒后號神兵。弔民資智勇，治亂屬
師貞。我君膺寶業，歷駕視前英。蒲海方無浪，夷
山未有平。星光下結旆，劍氣上舒精。雲開萬里
徹，日麗百川明。撫鼓山靈應，詔蹕水祗驚。

望郢州城

魂兮何遽返，非死復非僊。坐柯如昨日，石合一作
石合未淹年。歷陽頓成浦，東海果爲田。空憶扶風

沈氏中集 卷五
詠誰一作惟見峴山傳世變才良改時移民物遷
悲哉孫驃騎悠悠哭彼天

長安還至方山愴然自傷

秦軍坑趙卒遂有一人生雖還舊鄉里危心曾
未平淮源北桐栢方山似削成猶疑屯虜騎尚
畏值胡兵空村餘拱木廢邑有頽城舊識旣已
盡新知皆異名百年三萬日處處此傷情

離合詩贈江藻

閨門枕芳野井上發紅桃林中藤蔦秀木末風

雲高屋室何寥廓至士隱蓬蒿故知人外賞文
酒易陶陶友朋足諧晤又此盛詩騷朗月同携
手良景共含毫樂巴有妙術言是神僊曹百年
肆偃仰一理詎相勞閑居有樂

建除詩

建章連鳳闕藹藹入雲煙除庭發槐柳冠劍似
神僊滿衢飛玉軼夾道躍金鞭平明塵霧合薄
暮風雲騫定交太學裏射策雲臺邊執事一朝
謬朝市忽崩遷破家徒徇國力弱不扶顛危機

空履虎、擊惡豈如鷓、成師鑿門去、敗績裹尸旋、
收魂不入斗、抱景問穹玄、開顏何所說、空憶平
生前、閉門窮巷里、靜掃詠歸田、

六府詩

水、廣、南、山、暗、杖、策、出、蓬、門、火、炬、村、前、發、林、煙、樹
下、昏、金、花、散、黃、蕙、蕙、草、雜、芳、蓀、木、蘭、露、漸、落、山
芝、風、屢、翻、土、高、行、已、冒、抱、甕、憶、中、園、穀、城、定、若
近、當、終、黃、石、言、

八音詩

金屋貯阿嬌、樓閣起迢迢、石頭足年少、大道跨
河橋、絲桐無緩節、羅綺自飄飄、竹煙生薄晚、花
色亂春朝、匏瓜詎無匹、神女嫁蘇韶、土地多妍
冶、鄉里足塵囂、革年未相識、聲論動風飈、木桃
堪底用、寄以答瓊瑤、

六甲詩

甲、拆、開、衆、果、萬、物、具、敷、榮、乙、飛、上、危、幕、雀、乳、出
空、城、丙、魏、舊、勲、業、申、韓、事、刑、名、丁、翼、陳、詩、罷、公
緩、作、賦、成、戊、巢、花、已、秀、滿、塘、草、自、生、已、乃、忘、懷

沈氏中集 卷全
客榮樂尚關情，庚庚聞鳥嘯，肅肅望鳧征，辛酸
多憫惻，寂寞少逢迎，壬蒸懷太古，覆妙佇無名，
癸已空施位，詎以召幽貞。

十二屬詩

鼠迹生塵案，牛羊暮下來，虎嘯生當作坐空谷，兔
月向牕開，龍隰遠青翠，蛇柳近裴徊，馬蘭方遠
摘，羊負始春裁，猴栗羞芳果，鷄跖引清杯，狗其
懷物外，猪蠡宵悠哉。

從遊天中寺應令

福界新開草，名僧共下筵，楊枝生拱樹，錫杖咒
飛泉，石座應朝講，山龕擬夜禪，當非舍衛國，賣
地取金錢。

同庾中庶肩吾周處士弘讓遊明慶寺

鷲嶺三層塔，菴園一講堂，馴鳥逐飯磬，狎獸繞
禪牀，擿菊山無酒，燃松夜有香，幸得同高勝，於
此瑩心王。

名都一何綺

陸士衡擬古詩云，名都
一何綺，城闕鬱盤桓。

沈休中集 卷全
名都一何綺，春日吐光輝。高樓雲母扇，複殿琉璃扉。昭儀同輦出，高安連騎歸。欲知天子貴，千門應紫微。

爲我彈鳴琴

爲我彈鳴

玉臺作清

琴，琴鳴傷我襟，半死無人見。入

竈始知音，空爲貞女引。誰達楚妃心，雍門何假說。落淚自淫淫。

賦得邊馬有歸心

王瓚詩朔風動秋草，邊馬有歸心。

窮秋邊馬肥，向塞甚思歸。連鑣渡蒲海，束舌下金微。已卻魚麗陣，將推鶴翼圍。彌憶長楸道，金

鞭

一作鞍

背落暉。

詠老馬

昔日從戎陣，流汗幾東西。一日馳千里，三丈拔深泥。渡水頻傷骨，翻霜屢損蹄。勿言年齒暮，尋途尚不迷。

和蔡黃門口字詠絕句

囂囂宮閣路，靈靈谷口間。誰知名器品，語嘿各

沈炯傳
崎嶇

本傳

沈炯字初明，吳興武康人也。祖瑀，梁尋陽太守，父續，王府記室參軍。炯少有雋才，爲當時所重。釋褐，王國常侍，遷爲尚書左民侍郎，出爲吳令。侯景之難，吳郡太守袁君正入援京師，以炯監郡。京城陷，景將宋子仙據吳興，遣使召炯，委以書記之任。炯固辭以疾。子仙怒，命斬之。炯解衣將就戮，礙於路間桑樹，乃更牽往他所，或遽救之，僅而獲免。子仙愛其才，終逼之令掌書記。及

沈氏中集 卷之三
子仙爲王僧辯所敗。僧辯素聞其名於軍中。購得之。酬所獲者鐵錢十萬。自是羽檄軍書皆出於炯及簡文。遇害。四方岳牧皆上表於江陵。勸進。僧辯令炯製表。其文甚工。當時莫有逮者。高祖南下。與僧辯會於白茅灣。登壇設盟。炯爲其文。及侯景東奔。至吳郡。獲炯妻虞氏。子行簡。並殺之。炯弟攜其母逃。而獲免。侯景平。梁元帝愍其妻子嬰戮。特封原鄉縣侯。邑五百戶。僧辯爲司徒。以炯爲從事中郎。梁元帝徵爲給事黃門。

侍郎。領尚書左丞。荊州陷。爲西魏所虜。魏人甚禮之。授炯儀同三司。炯以母老在東。恒思歸國。恐魏人愛其文才而留之。恒閉門却掃。無所交遊。時有文章。隨卽棄毀。不令流布。嘗獨行經漢武通天臺。爲表奏之。陳已思歸之意。其夜炯夢見有宮禁之所。兵衛甚嚴。炯便以情事陳訴。聞有人言。甚不惜放卿還。幾時可至。少日便與王克等並獲東歸。紹泰二年。至都。除司農卿。遷御史中丞。高祖受禪。加通直散騎常侍。中丞如故。

以母老表請歸養。詔不許。文帝嗣位，又表請歸。優詔答之。初，高祖嘗稱焜宜居王佐軍國大政，多預謀謨。文帝又重其才，用欲寵貴之。會王琳入寇大雷，留異擁據東境，帝欲使焜因是立功，乃解中丞，加明威將軍，遣還鄉里，收合徒衆，以疾卒於吳中。時年五十九。文帝聞之，卽日舉哀，并遣弔祭，贈侍中，謚曰恭子。有集二十卷，行於世。

史臣曰：沈焜仕於梁室，年在知命，吳郎署之蒲官，止邑宰之卑職，及下筆盟壇，屬辭勸表，激揚旨趣，信文人之偉者歟。

沈侍中集終

沈氏中身

卷全

五



國家圖書館, NATIONAL CENTRAL LIBRARY, TAIWAN, R.O.C.